

“Ta ken no kier biba den un bario bunita asina” E di dos fase di renobacion di Juana Morto Complex ta casi cla!

E bario mas desconoci na Aruba a bira e bario mas gusta di Aruba! Juana Morto Complex, un grupo di 52 cas di famia, a bira e modelo pa renobacion di barionan rond di nos isla.

HOPÍ hende a kere cu ta dijs pa bishita di Su Mahestad La Reina a renoba e caya y algun cas y cu resto di e casnan lo a keda mescos cu nan tabata for dia cu a traha nan.

Awor tur hende ta wak cu loke Gabinete Mike Eman a bisa, ta birando realidad! Tur e 52 casnan ta den renobacion y pa comienso di otro aña henter e proyecto lo ta cla.

Tambe e conexion di e bario di Juana Morto Complex cu e bario di De Vuyst. (De Vuyst tambe ta den renobacion). Casnan nobo, lus moderno, centro pa actividad di bario, caya yen di mata.

Rene Herde tin basta aña ta bishita e habitantenan di e barionan aki di San Nicolas. Un tempo e barionan mas pover di nos isla.

Segun Rene Herde esaki tabata un di e motibonan pakico

a scoge e bario aki como un di e prome barionan ta renoba den cuadro di e proyecto “Bo Bario”. “E bario aki tabatin tur e caracteristicanan di un bario lubida y cu hende no lo kier a biba aden. Pobreza, criminalidad, droga, adiccion, scuridad anochi, ningun actividad di bario, hendenan hoben ta bandona e bario y no tabatin ningun interes pa renoba e bario.

A cuminsa cu stimula e habitantenan mes pa organisa e bario. Pa trece e hendenan hunto pa conoce otro y cuminsa traha hunto pa mehora bida den nan propio bario. Awe e organisacion di habitantenan “Vision Nobo di Juana Morto Complex y Becindario” ta un di e organisacionnan di habitantenan di bario mas activo. Nan mes a traha plannan pa dreha e casnan y e bida den barrio,” segun Rene Herde.

CAMBIO

Mientras cu e bario di Juana Morto Complex mes a cuminsa organisa e habitantenan y tene actividadnan regularmente, e deseo di renobacion fisico di e bario mester a warda te ora Go-

bierno a cambia na fin di 2009. E ora e cambionan fisico a cuminsa y e revitalisacion di e bida den e bario a haya mas forsa. Awe e bario ta bunita di tur angulo cu bo wak e. E potretnan riba e pagina aki ta demostra esaki.

Di acuerdo cu Rene Herde: “Den combersacion cu algun di e habitantennan cu tin mas cu 10 aña ta biba den e bario aki, bo ta tende den nan propio palabranan, con nan a wak nan bario cambia pa mihor y con nan ta sinti pa biba den e bario cu a bira modelo pa barionan na Aruba. Alex: “Nos a soña cu nos lo por drecha e bario y haci’e bon y sigur pa biba aden. Pero loke Gobierno y FCCA a haci ta surpasa loke nos a imagina. Y e bon ta, cu e architectonan manera Rafi Kock y trahadornan manera Marouscha Rafini di FCCA, a scucha nos, a laga nos participa den traha e plannan pa nos bario y te awe ta traha cu nos pa sigui mehora e bida den e bario. Wak con bunita nos bario a bira. Ta ken no lo kier biba den un bario asina.”



Rose, tambe un habitante di hopi aña ta añadi: “Y nos no ta bay di aki mas tampoco. Ta hopi hende a puntra nos si no tin cas ta bini liber pa nan bin biba aki. Ami no ta kere!”

Segun Rene Herde: “E proyecto di renobacion di un di e barionan mas pover di nos isla ta muestra cu nos por trece cambio

di berdad den bida diario di hende. E ta duna nos confiansa cu tur e barionan di nos isla cu ta pidi pa wordo renoba, cu tempo, lo por wordo renoba manera a haci cu Juana Morto Complex. Cambio di berdad ta posibel.

E ta sosodiendo na Aruba. Ta riba e caminda aki nos mester sigui!